

(2) Bagi maksud Bab ini, “perbuatan pengganas” bermaksud suatu perbuatan atau ugutan tindakan dalam atau luar Malaysia di mana—

(a) perbuatan atau ugutan jatuh di bawah subseksyen (3) dan tidak jatuh di bawah subseksyen (4);

(b) perbuatan itu dilakukan atau ugutan dibuat dengan niat untuk melanjutkan suatu perjuangan politik, agama atau ideologi; dan

(c) perbuatan atau ugutan berniat atau yang boleh semunasabahnya dianggap sebagai berniat untuk—

(i) menakutkan orang awam atau sebahagian daripada orang awam; atau

(ii) mempengaruhi atau memaksa Kerajaan Malaysia atau Kerajaan mana-mana Negeri di Malaysia, mana-mana Kerajaan lain, atau mana-mana organisasi antarabangsa untuk membuat atau menahan daripada melakukan apa-apa perbuatan.

(3) Suatu perbuatan atau ugutan jatuh di bawah subseksyen ini jika ia—

(a) melibatkan cedera parah pada tubuh seseorang;

(b) membahayakan nyawa seseorang;

(c) menyebabkan kematian seseorang;

(d) mewujudkan risiko yang serius pada kesihatan atau pada keselamatan awam atau sebilangan orang awam;

(e) melibatkan kerosakan serius pada harta benda;

(f) melibatkan penggunaan senjatapi, bahan letupan atau alat berbahaya yang lain;

(g) melibatkan pembebasan ke dalam persekitaran alam atau mana-mana bahagian persekitaran alam atau mengedar atau mendedah orang awam atau mana-mana bahagian orang awam kepada—

(i) mana-mana bahan bahaya, berbahaya, radioaktif atau memudaratkan;

- (ii) mana-mana bahan kimia toksik; atau
- (iii) mana-mana microbial atau agen biologi atau toksin;
- (h) adalah direka bentuk atau berniat untuk mengganggu atau mengusik secara serius, mana-mana sistem komputer atau peruntukan mana-mana perkhidmatan yang berkaitan secara langsung dengan infrastruktur komunikasi, perkhidmatan perbankan atau kewangan, utiliti, pengangkutan atau infrastruktur penting yang lain;
- (i) adalah direka bentuk atau berniat untuk mengganggu, atau mengusik secara serius, peruntukan perkhidmatan kecemasan yang penting seperti polis, pertahanan awam atau perkhidmatan perubatan;
- (j) melibatkan prejudis kepada keselamatan negara atau keselamatan awam;
- (k) melibatkan kombinasi mana-mana tindakan yang ditentukan dalam perenggan (a) hingga (j),

dan termasuk apa-apa perbuatan atau peninggalan yang boleh menjadikannya suatu kesalahan di bawah Akta Kesalahan-Kesalahan Penerbangan 1984¹.

(4) Suatu perbuatan atau ugutan jatuh di bawah subseksyen ini jika ia— [Mas. Akta A1303]

(a) adalah sokongan, bantahan, pertentangan pendapat atau tindakan industri; dan

(b) tidak berniat—

- (i) untuk menyebabkan cedera parah pada tubuh seseorang;
- (ii) untuk membahayakan nyawa seseorang;
- (iii) untuk menyebabkan kematian seseorang; atau
- (iv) untuk mewujudkan risiko yang serius pada kesihatan atau pada keselamatan awam atau sebilangan orang awam.